

Na osnovu člana 14. Zakona o udruženjima i fondacijama („Službene novine Federacije BiH“, broj: 45/02) i člana 37. Zakona o mladima Federacije Bosne i Hercegovine („Službene novine Federacije BiH“, broj: 36/10), Skupština Vijeća mladih Grada Tuzla na III vanrednoj sjednici, održanoj 19.11.2025. godine donosi

STATUT

Vijeća mladih Grada Tuzla

I OSNOVNE ODREDBE

Član 1.

- (1) Ovim Statutom uređuju se:
- a) naziv i sjedište udruženja;
 - b) ciljevi i djelatnost udruženja;
 - c) zastupanje i predstavljanje udruženja;
 - d) organi udruženja, njihove ovlasti, način imenovanja i opoziva, trajanje mandata, kvorum i pravila glasanja;
 - e) oblik i sadržaj pečata udruženja;
 - f) stjecanje i raspolaganje imovinom;
 - g) način donošenja Finansijskog izvještaja i Izvještaja o radu;
 - h) postupak za donošenje Statuta, izmjene i dopune Statuta i drugih općih akata udruženja;
 - i) uslovi i način učlanjenja, prestanak članstva, kao i prava, dužnosti i odgovornost članova/ica udruženja;
 - j) uslovi i postupak za pripajanje, razdvajanje, transformaciju ili prestanak rada udruženja;
 - k) javnost rada udruženja;
 - l) pravila za raspodjelu preostale imovine u slučaju prestanka rada udruženja;
 - m) druga pitanja od značaja za ostvarivanje ciljeva udruženja.

Član 2.

- (1) Udruženje Vijeće mladih Grada Tuzla (u daljem tekstu: VMGT) je slobodna, dobrovoljna, vanstranačka, nevladina i neprofitna mreža omladinskih organizacija.

Član 3.

- (1) Naziv udruženja je Vijeće mladih Grada Tuzla (u daljem tekstu: VMGT)
- (2) Skraćeni naziv udruženja je VMGT.
- (3) Sjedište VMGT je u Tuzli, u ulici Dragiše Trifkovića broj 2, 75000 Tuzla.
- (4) VMGT ima svojstvo pravnog lica i djeluje na području Grada Tuzla.

Član 4.

- (1) VMGT ima pečat.
- (2) Pečat VMGT je okruglog oblika, promjera 30 mm.
- (3) Skupština VMGT odlučuje o detaljnom izgledu pečata.

- (4) Vijeće mladih ima 1 pečat i to pečat okruglog oblika, prečnika 30mm u mokroj izvedbi. Tekst pečata je ispisan koncentričnim krugom oko znaka Vijeća mladih Grada Tuzla. Tekst je razgraničen sa zvjedicom, te se ispred i iza njega nalazi puni koncentrični krug. Tekst pečata ispisan je na bosanskom jeziku i latiničnom pismu.

Član 5.

- (1) VMGT predstavlja i zastupa predsjednik/ca VMGT i potpredsjednik/ca VMGT.

II CILJEVI I DJELATNOSTI VMGT

Član 6.

- (1) Ciljevi VMGT jesu:
- a) jačanje uključenosti mladih u društveni i politički život zajednice;
 - b) ostvarivanje saradnje između članica VMGT i organa lokalne uprave;
 - c) kontinuirana promocija rada s mladima i omladinskog rada generalno;
 - d) popularizacija i širenje svijesti o značaju rada sa mladima i pristupa mladima;
 - e) aktivno učešće u izradi strateških dokumenata i operativnih programa iz oblasti rada sa mladima i omladinskog rada;
 - f) kontinuirano unapređenje položaja mladih u Gradu Tuzla;
 - g) saradnja VMGT sa drugim općinskim/gradskim vijećima mladih, kao i s vijećima mladih na višim nivoima.

Član 7.

- (1) Radi ostvarivanja ciljeva VMGT naročito:
- a) razmjenjuje informacije, iskustva i primjere dobre prakse među članicama;
 - b) neformalno obrazuje svoje članice i druge zainteresovane strane koje se bave pitanjima mladih;
 - c) izrađuje publikacije radi ostvarivanja ciljeva VMGT;
 - d) organizuje javne rasprave, izrađuje analize i prijedloge za unapređenje položaja mladih;
 - e) izrađuje i provodi zajedničke programe, kampanje i javne inicijative članica VMGT;
 - f) javno zagovara interese i potrebe mladih;
 - g) učestvuje u poboljšanju lokalne politike prema mladima;
 - h) učestvuje u izradi i provođenju lokalne Strategije prema mladima;
 - i) doprinosi razvoju sporta, kulture, umjetnosti, odgoja, obrazovanja, volonterizma i drugih sfera života od interesa za mlade, a u skladu sa Zakonom;
 - j) inicira projekte koji će se baviti pitanjima od posebne važnosti za mlade;
 - k) učestvuje u javnim raspravama i konsultacijama organa vlasti;
 - l) potiče mlade ljude da učestvuju u razvoju demokratskog društva, naročito kroz odgovorno i smostalno djelovanje, kritičko mišljenje, kao i socijalno i solidarno ponašanje;
 - m) potiče mlade ljude na međusobno razumijevanje i spremnost na saradnju u društvu;
 - n) djeluje protiv militarističkih, nacionalističkih, rasističkih i totalitarnih stremljenja članica ili pojedinčanih mladih ljudi;
 - o) potiče cjelokupnu lokalnu zajednicu na primjerenu i prilagođenu ponudu aktivnosti iz oblasti rada s mladima i omladinskog rada;

- p) saraduje s neformalnim grupama mladih, potiče njihov razvoj, te ih uključuje u svoje aktivnosti gdje za to postoje mogućnosti;
- q) saraduje sa drugim organizacijama/fondacijama, radi ostvarivanja potreba i interesa za VMGT;
- r) zalaže se za rodnu ravnopravnost, društvenu uključenost i jednake mogućnosti za sve mlade ljude;
- s) obavlja druge poslove i zadaće koje su utvrđene propisima iz oblasti rada s mladima i omladinskog rada.

Član 8.

(1) Obaveze i zadaci VMGT:

- a) VMGT ima obavezu djelovanja na jačanju uključenja mladih u društveni život zajednice i njihovom informisanju;
- b) VMGT ima pravo i obavezu legitimno predstavljati i zastupati interese svojih članica;
- c) VMGT će biti direktno uključeno u proces izrade i provođenja Strategija prema mladima u Gradu Tuzla, s ciljem doprinošenja usvajanju i provođenju politika prema mladima i programa djelovanja za mlade koji najviše odgovaraju potrebama i pitanjima mladih;
- d) VMGT bavit će se provođenjem zajedničkih projekata mladih u Bosni i Hercegovini te članstva i učešća, odnosno predstavljanja pitanja mladih i na međunarodnom planu;
- e) VMGT bavit će se i politikama koje se posredno dotiču mladih i koje utječu na opći razvoj i prosperitet, te opću društvenu dobrobit, kao i svim ostalim pitanjima koje se posredno odnose na mlade;
- f) VMGT će delegirati svoje predstavnike/ce u stručna radna tijela i komisije pri organu lokalne uprave u skladu sa Statutom Grada Tuzla;
- g) VMGT će učestvovati u javnim raspravama i konsultacijama organa vlasti u procesu usvajanja: određene sektorske politike prema mladima, programa djelovanja za mlade, Strategije prema mladima, dijelova budžeta koji se tiču pitanja mladih;
- h) VMGT i njegove članice u ime VMGT se ne mogu ni na koji način angažovati u predizbornim kampanjama političkih stranaka, koalicija i nezavisnih kandidata, niti im pružati podršku;
- i) Zabranjene su djelatnosti VMGT koje su usmjerene ka podrivanju ustavnog poretka i koje su u suprotnosti sa Zakonom;
- j) VMGT ni njegove članice se ne smiju baviti aktivnostima kojima se na bilo koji način raspiruje govor mržnje, širi netolerancija, ksenofobija ili rasizam, ili vrši diskriminacija bilo koga po bilo kojoj osnovi.

III ORGANI VMGT

Član 9.

- (1) Organi upravljanja VMGT su Skupština i Upravni odbor.
- (2) U svakom od organa upravljanja VMGT treba biti osigurana rodna ravnopravnost članova/ica, ukoliko je to moguće.
- (3) Skupštinu VMGT mora činiti najmanje 2/3 mladih osoba, dok Upravni odbor mora biti sačinjen od isključivo mladih osoba.
- (4) Sve osobe u organima upravljanja moraju biti punoljetne.

Skupština VMGT

Član 10.

- (1) Skupština VMGT je najviši organ upravljanja VMGT.
- (2) Skupštinu VMGT čine delegati/kinje, odnosno predstavnici članica VMGT (u daljem tekstu: članica), koja su upisana u registar omladinskih udruženja Grada Tuzla, a u skladu sa Zakonom o mladima FBiH.
- (3) Članice delegiraju po najviše tri svoja/e delegata/kinje u Skupštinu Vijeća, od čega najmanje 2/3 moraju biti iz reda mladih.
- (4) Svaki delegat/kinja ima jedan glas u Skupštini VMGT.
- (5) Skupština VMGT ima sljedeće nadležnosti:
 - a) donosi Statut, izmjene i dopune Statuta i druge akte određene Statutom;
 - b) daje saglasnost na pravne radnje preduzete u postupku osnivanja VMGT;
 - c) imenuje i opoziva osobu ovlaštenu za zastupanje i predstavljanje VMGT, kao i Upravni odbor;
 - d) usvaja izvještaje Upravnog odbora;
 - e) razmatra i usvaja Godišnji plan rada Upravnog odbora VMGT;
 - f) razmatra prijem novih članica u VMGT;
 - g) odlučuje o prestanku rada i drugim statusnim promjenama;
 - h) odlučuje o formiranju radnih tijela Skupštine VMGT;
 - i) vrši ulogu medijatora;
 - j) vrši nadzor nad Upravnim odborom VMGT.
- (6) Rukovodstvo Skupštine VMGT čine predsjednik/ca, zamjenik/ca predsjednika/ce i zapisničar/ka.
- (7) Lica iz stava (6) ovog člana biraju se na mandatni period od dvije (2) godine.
- (8) Zamjenik/ca predsjednika/ce iz stava (6) ovog člana treba biti suprotnog spola od predsjednika/ce, ukoliko je to moguće.
- (9) U slučaju odsustva ili spriječenosti predsjednika/ce Skupštine da obavlja funkciju zamjenjuje ga zamjenik/ca predsjednika/ce.

Član 11.

- (1) Da bi se Skupština mogla održati, neophodno je prisustvo više od 50% članova/ica Skupštine (50%+1), računajući od maksimalnog broja delegata koje može delegirati svaka članica Vijeća, s tim da na Skupštini mora biti prisutan najmanje po jedan/na delegat/kinja iz 1/2 članica Vijeća.
- (2) Nakon prvobitnog sazivanja Skupštine, u slučaju nemogućnosti osiguravanja kvoruma do dana njenog održavanja, saziva se nova (ponovljena) Skupština u roku od 7 (sedam) dana, s tim da je na toj Skupštini dovoljno da prisustvuje najmanje po jedan/na delegat/kinja iz 50% članica VMGT (50%+1).
- (3) Isto pravilo, definisano u stavu (2) ovog člana, se odnosi i za održavanje vanredne Skupštine.
- (4) Prije sazivanja sjednice Skupštine predsjednik/ca Skupštine mora provjeriti jesu li sve aktuelne članice VMGT na gradskom registru omladinskih udruženja.

- (5) Skupštine VMGT odlučuje o svim pitanjima apsolutnom većinom prisutnih delegat/kinja članica Skupštine (50%+1).
- (6) Skupština odlučuje kvalificiranom dvotrećinskom većinom o usvajanju, izmjenama i dopunama Statuta VMGT, kao i o statusnim promjenama, pripajanju i prestanku rada.
- (7) Glasanje je javno, ako drugačije ne odluči Skupština prije samog glasanja.
- (8) Skupština, odnosno delegati u Skupštini se biraju na vremenski period od 2 (dvije) godine.
- (9) Skupština može biti redovna i vanredna.
- (10) O održavanju Skupštine moraju biti obaviještene sve članice VMGT u pisanom obliku, najkasnije 14 (četnaest) dana prije njenog održavanja.
- (11) Dnevni red mora biti dostavljen svim članicama VMGT i udruženjima koja su podnijela zahtjev za članstvo najkasnije 14 (četnaest) dana prije održavanja Skupštine.
- (12) Članice su dužne dostaviti prijedlog za Dnevni red i imena svojih delegat/kinja najkasnije 7 (sedam) dana prije održavanja redovne i 3 (tri) dana prije održavanja vanredne Skupštine.
- (13) Redovna Skupština se održava jedanput godišnje i saziva je predsjednik/ca Skupštine.
- (14) Vanredna Skupština održava se po potrebi i na prijedlog Upravnog odbora ili kada to zatraži 1/3 delegata/kinja Skupštine VMGT.
- (15) O održavanju vanredne Skupštine moraju biti obaviještene sve članice VMGT u pisanom obliku, najkasnije 7 (sedam) dana prije njenog održavanja.
- (16) Skupština VMGT raspravlja i odlučuje na sjednicama.
- (17) Sjednice Skupštine VMGT mogu biti održane i u elektronskom formatu, koristeći mrežne informaciono-tehničke alate za online komunikaciju.
- (18) Odluku o načinu održavanja sjednice Skupštine VMGT donosi Upravni odbor VMGT, uzimajući u obzir sve okolnosti koje na održavanje iste mogu imati uticaja.
- (19) Predsjednik/ca Skupštine saziva sjednice Skupštine, predsjedava sjednicama i brine se o provođenju odluka koje donosi Skupština.
- (20) Predsjednik/ca Skupštine ne može biti član/ica Upravnog odbora VMGT.
- (21) Mandat delegatu/kinji Skupštine VMGT prestaje:
 - a) ostavkom;
 - b) opozivom matične članice;
 - c) prestankom članstva članice u Vijeću mladih;
 - d) smrću.

Član 12.

- (1) Bliže odredbe o načinu rada Skupštine, glasanja, odlučivanja, upućivanja poziva za sjednice, vođenja Zapisnika i drugim pitanjima od značaja za rad Skupštine uređuju se Poslovníkom o radu Skupštine.

Upravni odbor VMGT

Član 13.

- (1) Upravni odbor VMGT sastoji se od 5 članova/ica (predsjednika/ce, potpredsjednika/ce i 3 člana/ice).
- (2) Članstvo Upravnog odbora mora biti sačinjeno od isključivo mladih osoba.
- (3) U Upravnom odboru treba osigurati rodnu ravnopravnost, ukoliko je to moguće.

- (4) Od tri delegata/kinje Skupštine članice VMGT, jednog/u člana/članicu matična organizacija može predložiti kao svog/ju delegata/kinju u Upravni odbor VMGT.
- (5) Svaki/a član/ica Upravnog odbora ima jedan glas u Upravnom odboru.
- (6) Član/ica Upravnog odbora ne može biti uposlenik/ca u gradskom organu uprave.
- (7) Upravni odbor VMGT raspravlja i odlučuje na sjednicama.
- (8) Sjednice Upravnog odbora VMGT mogu biti održane i u elektronskom formatu, koristeći mrežne informaciono-tehničke alate za online komunikaciju.
- (9) Odluku o načinu održavanja sjednica Upravnog odbora VMGT donosi predsjednik/ica VMGT u konsultaciji sa ostalim članovima/icama Upravnog odbora VMGT.
- (10) U određenim slučajevima kada član/ica i/ili članovi/ce Upravnog odbora VMGT nisu u mogućnosti fizički prisustvovati sjednicama Upravnog odbora VMGT, isti se sjednici Upravnog odbora VMGT mogu priključiti telefonskim putem i/ili koristeći mrežne informatičko-tehničke alate za online komunikaciju (korespondentna sjednica).
- (11) Upravni odbor sastaje se najmanje jednom mjesečno, na pisani poziv predsjednika/ce VMGT, a na sastanku mora biti pristuno najmanje 50%+1 članova/ica Upravnog odbora.
- (12) Upravni odbor donosi odluke apsolutnom većinom prisutnih članova/ica Upravnog odbora (50%+1).
- (13) Upravni odbor ima sljedeće nadležnosti:
 - a) priprema sjednica Skupštine;
 - b) priprema i predlaže nacrt izmjena Statuta i drugih akata koje donosi Skupština;
 - c) provodi politiku, zaključke i druge odluke koje je donijela Skupština;
 - d) predlaže Skupštini Godišnji plan rada VMGT;
 - e) donosi Poslovnik o radu Upravnog odbora;
 - f) upravlja imovinom VMGT;
 - g) raspoložbe sredstvima VMGT;
 - h) podnosi godišnje i druge izvještaje o svom radu, kao i finansijske izvještaje Skupštini na usvajanje;
 - i) ostvaruje kontakte i saradnju s organima javne uprave, drugim udruženjima i institucijama, pravnim i fizičkim licima, radi ostvarivanja interesa i potreba VMGT;
 - j) brine se o primjeni Statuta;
 - k) vodi brigu o zastupanju i predstavljanju VMGT u kantonalnom Vijeću mladih;
 - l) obavještava članice i javnost o svom djelovanju;
 - m) može formirati stalna ili povremena radna tijela, ovisno o potrebi;
 - n) obavlja druge poslove određene Statutom;
 - o) imenuje i opoziva osobe koje predstavljaju VMGT u Vijeću mladih na nivou Tuzlanskog kantona
 - p) odlučuje o svim drugim pitanjima koja nisu definisana Statutom.

Član 14.

- (1) Članovi/ice Upravnog odbora VMGT biraju se na mandat od 2 (dvije) godine.
- (2) Izuzetno, mandat člana/ice Upravnog odbora VMGT može prestati i prije isteka vremena na koje je izabran/a, i to:
 - a) na sopstveni zahtjev člana/ice Upravnog odbora VMGT;

- b) ako član/ica Upravnog odbora VMGT ne prisustvuje sjednicama Upravnog odbora VMGT tri puta uzastopno i/ili ukoliko ne prisustvuje na najmanje 80% sjednica u periodu od zadnjih godinu dana bez opravdanog razloga
 - c) ako član/ica Upravnog odbora VMGT ne izvršava preuzete obaveze u dogovorenom roku, ne učestvuje u pripremi i provođenju aktivnosti ili ne prisustvuje aktivnostima VMGT, u što se ubrajaju događaji predviđeni Planom aktivnosti VMGT, sastanci, seminari, radionice i drugo bez opravdanog razloga
 - d) ako svojim radnjama u vezi sa radom u Upravnom odboru VMGT narušava ugled VMGT;
 - e) kao i u drugim slučajevima predviđenim Zakonom, ovim Statutom i aktima VMGT.
- (3) Ukoliko se ispuni jedan ili više uslova iz stava 2., na prijedlog najmanje jednog člana Upravnog odbora saziva se vanredna Skupština VMGT prema pravilima i principima održavanja vanredne Skupštine VMGT.
 - (4) Za upražnjeno mjesto člana/ice Upravnog odbora VMGT ne mogu biti izabrani kandidati/kinje one članice VMGT čijem je kandidatu/kinji prestao da važi mandat.
 - (5) O opozivu, odnosno prijevremenom prestanku mandata, člana/ice Upravnog odbora VMGT odlučuje Skupština VMGT.
 - (6) Svi članovi/ice Upravnog odbora VMGT biraju se na redovnim izbornim skupštinama VMGT, koje se u pravilu održavaju svake 2 (dvije) godine.
 - (7) Izuzetak od pravila definisanog u prethodnom stavu ovog člana postoji u slučaju kada u toku trajanja mandata aktuelnog saziva Upravnog odbora VMGT dođe do upražnjavanja mjesta u Upravnom odboru VMGT, zbog razloga definisanih u stavu 2. ovog člana, u kojem slučaju se upražnjena mjesta članova/ice Upravnog odbora VMGT mogu popuniti na redovnim izvještajnim skupštinama, koje se u pravilu održavaju svake godine, kao i vanrednim skupštinama.
 - (8) U slučaju kada se upražnjena mjesta članova/ica Upravnog odbora VMGT popune na način opisan u stavu 5. ovog člana Statuta, njihov mandat će, u pogledu trajanja, biti izjednačen sa trajanjem mandata drugih tada aktuelnih članova/ica Upravnog odbora VMGT.
 - (9) Za upražnjena mjesta članova/ica u Upravnom odboru VMGT ne mogu biti izabrani kandidati/kinje onih članica VMGT koje u tada aktuelnom sazivu Upravnog odbora VMGT već imaju svog delegata/kinju
 - (10) Procedura u pogledu izbora članova/ica Upravnog odbora VMGT na upražnjena mjesta, opisana u prethodnim stavovima ovog člana, korespondira proceduri izbora novog saziva Upravnog odbora VMGT, definisanoj ovim Statutom.
 - (11) Bliže odredbe o načinu rada Upravnog odbora VMGT, glasanja, odlučivanja, upućivanja poziva za sjednice, vođenja zapisnika i drugim pitanjima od značaja za rad Upravnog odbora VMGT uređuju se Poslovníkom o radu Upravnog odbora VMGT.

Predsjednik/ca VMGT

Član 15.

- (1) Predsjednik/ca Upravnog odbora VMGT je predsjednik/ca VMGT.
- (2) Predsjednika/cu VMGT bira Skupština iz reda članova/ica Upravnog odbora, na mandat od 2 (dvije) godine, s mogućnošću ponovnog izbora najviše 2 (dva) uzastopna mandata.
- (3) Predsjednik/ca VMGT i predsjednik/ca Skupštine VMGT ne smiju biti iz iste članice VMGT.
- (4) Predsjednik/ca VMGT u vršenju svoje funkcije:
 - a) predstavlja i zastupa VMGT;

- b) potpisuje opće i pojedinačne akte koje donosi Upravni odbor VMGT;
- c) usklađuje i koordinira rad VMGT;
- d) podnosi godišnje ili periodične izvještaje o svom radu i finansijske izvještaje članovima/icama Upravnog odbora;
- e) priprema materijale za sjednice Upravnog odbora;
- f) vrši i druge poslove u skladu sa Zakonom, Statutom i drugim općim aktima VMGT.

Potpredsjednik/ca VMGT

Član 16.

- (1) Potpredsjednika/cu VMGT bira Skupština iz reda članova/ica Upravnog odbora, na mandat od 2 (dvije) godine, s mogućnošću ponovnog izbora najviše 2 (dva) uzastopna mandata.
- (2) Potpredsjednik/ca VMGT mora biti iz reda mladih.
- (3) U slučaju odsutnosti ili spriječenosti predsjednika/ce VMGT da obavlja funkciju, zamjenjuje ga potpredsjednik/ca VMGT.
- (4) Potpredsjednik/ca VMGT treba biti suprotnog spola u odnosu na predsjednika/cu VMGT, ukoliko je to moguće.

Član 17.

- (1) Za obavljanje stručnih poslova koji su potrebni za nesmetano provođenje programskih ciljeva VMGT mogu se angažovati stručne osobe.
- (2) Proceduru izbora i imenovanja osoba iz prethodnog stava odredit će Upravni odbor u skladu sa Zakonom.

Predstavnik/ca VMGT u Komisiji za mlade, obrazovanje i sport pri Gradskom vijeću Tuzla

Član 18.

- (1) Predstavnik/ca Vijeća mladih Grada Tuzla u Komisiji za mlade, obrazovanje i sport pri Gradskom vijeću Grada Tuzla (u daljem tekstu: Komisija) bira se svake godine, na svakoj redovnoj Skupštini VMGT (izvještajnoj i izvještajno-izbornoj) i to na mandatni period od jedne godine.
- (2) Od tri predstavnika/ce koje organizacija članica VMGT može delegirati za učešće na Skupštini VMGT, jednog/u predstavnika/icu može kandidirati za predstavnika/cu u Komisiji.
- (3) Predstavnik/ca VMGT u Komisiji može biti i lice koje trenutno vrši određenu funkciju u VMGT (predsjednik/ica VMGT, zamjenik/ca predsjednika/ice VMGT, član/ica UO, predsjedavajući/a Skupštine ili zamjenik/ca predsjedavajućeg/e Skupštine), odnosno može dolaziti iz iste organizacije članice VMGT kao i prethodno pomenuta lica.
- (4) Predstavnik/ca VMGT u Komisiji bira se natpolovičnom većinom delegata/kinja Skupštine javnim ili tajnim glasanjem, u zavisnosti kako Skupština odluči. Ista osoba može biti Predstavnik/ca VMGT u Komisiji najviše dva puta uzastopno.
- (5) Izuzetno, Predstavnik/ca VMGT u Komisiji može biti izabran i na vanrednoj Skupštini VMGT u slučaju podnošenja ostavke trenutno izabranog Predstavnika/ice.
- (6) Mandat Predstavnika/ce VMGT u Komisiji u izbornoj godini (godini održavanja Lokalnih izbora u Bosni i Hercegovini) ili usljed raspuštanja Gradskog vijeća iz bilo kojeg razloga, trajat će do prve naredne redovne Skupštine VMGT, osim ako Skupština VMGT drugačije ne odluči u svakom konkretnom slučaju.

IV ČLANSTVO U VMGT

Član 19.

- (1) Omladinska udruženja koja su učestvovala u Osnivačkoj skupštini VMGT automatski su članice VMGT.
- (2) Punopravno članstvo u VMGT mogu zatražiti isključivo omladinska udruženja i to ona koja su zakonski registrovana najmanje 6 (šest) mjeseci i koja su upisana u Registru omladinskih udruženja koje vodi Grad Tuzla u skladu sa članom 15. Zakona o mladima FBiH, nakon što podnesu pisani zahtjev Skupštini VMGT i nakon što budu prihvaćena na sjednici Skupštine.
- (3) Nove članice imaju status posmatračice čime stječu prava učešća u radu VMGT bez prava odlučivanja.
- (4) Nove članice stječu punopravno članstvo nakon predaje pisanog zahtjeva i to na prvoj Skupštini nakon završetka tačke Dnevnog reda sjednice Skupštine na kojoj su postale članice, te ukoliko ispunjavaju uslove iz Zakona o mladima FBiH.
- (5) Neformalne grupe mladih tj. one koje se nalaze na gradskom spisku neformalnih omladinskih grupa, u skladu sa Zakonom o mladima FBiH, ne mogu biti punopravne članice VMGT.
- (6) Predstavnic/e neformalnih grupa mladih iz Grada Tuzla mogu prisustvovati sjednicama Skupštine VMGT i davati prijedloge, ali ne mogu birati niti biti birani/e.
- (7) Registrovana studentska udruženja koja okupljaju isključivo studente/ice iz Grada Tuzla mogu postati punopravne članice VMGT.
- (8) Pristupanje VMGT je dobrovoljno.
- (9) Skupština VMGT ne može ograničiti primanje i pristupanje novih članica ukoliko one ispunjavaju uslove iz Zakona o mladima FBiH i ukoliko se nalaze u Registru omladinskih udruženja u Gradu Tuzla i ukoliko ne postoje druge zakonske prepreke.
- (10) Sve članice VMGT obavezne su da plaćaju godišnju članarinu o čijem iznosu odlučuje Skupština VMGT.
- (11) Odluka o iznosu članarine, koju donosi Skupština VMGT, dostavlja se svim članicama VMGT neposredno nakon njenog donošenja.
- (12) Odluka iz prethodnog stava dostavlja se u pisanom obliku ili putem elektronske pošte svim članicama VMGT.
- (13) Članarine se uplaćuju na službeni bankovni račun VMGT, najkasnije do kraja prvog kvartala tekuće godine.
- (14) Detalji oko uplate članarine kao i broj računa na koji se članarina uplaćuje trebaju biti dostavljeni svim članicama VMGT uz Odluku o iznosu članarine.

Član 20.

- (1) Članica VMGT može biti isključena iz članstva u VMGT odlukom Skupštine, ukoliko se utvrdi da po definiciji Zakona o mladima FBiH više nije omladinsko udruženje ili ukoliko postupa suprotno ciljevima i Statutu VMGT, kao i njegovim pravilima rada.
- (2) Monitoring će vršiti Upravni odbor VMGT.
- (3) Članica VMGT može biti isključena iz članstva u VMGT ukoliko se utvrdi da članica nije ispoštovala odredbe iz člana 19., stav 10. i/ili ukoliko ista nije učestvovala u radu 2 (dvije) uzastopne Skupštine VMGT.

- (4) Prije donošenja odluke o isključenju članica VMGT mora biti obaviještena o prijedlogu za isključenje, kao i o razlozima zbog kojih se predlaže isključenje.
- (5) Članici se mora ostaviti rok od 7 (sedam) dana za izjašnjenje o pokrenutom prijedlogu za isključenje iz VMGT, kao i za dostavljanje dokaza o ispunjavanju uslova za daljnje članstvo.
- (6) Članica VMGT može i sama istupiti iz članstva, a u obliku pisanog obavještenja o istupanju predsjedniku/ci Skupštine VMGT.
- (7) Članica koja je isključena ili je sama istupila iz VMGT može podnijeti zahtjev za ponovno učlanjenje najranije godinu dana nakon donošenja odluke Skupštine VMGT o iščlanjenju.
- (8) Članica koja je istupila ili je isključena iz VMGT gubi sva prava koja imaju članice VMGT.
- (9) Članstvo organizacije u VMGT automatski prestaje po brisanju udruženja iz Registra udruženja.

Član 21.

- (1) Članice VMGT imaju prava kojima mogu:
 - a) birati i biti birane u organe VMGT;
 - b) aktivno učestvovati u ostvarivanju ciljeva VMGT;
 - c) biti redovno i pravovremeno obaviještene o aktivnostima VMGT;
 - d) saradivati sa ostalim članicama VMGT;
 - e) čuvati i podizati ugled VMGT;
 - f) preko izabranih delegata/kinja predlagati odluke i učestvovati u donošenju odluka VMGT;
 - g) ostvarivati druga prava i dužnosti utvrđene ovim Statutom i drugim općim aktima VMGT;
 - h) istupiti iz VMGT u skladu sa članom 18. ovog Statuta.
- (2) Članice VMGT kroz svoje izabrane delegate/kinje u organima VMGT imaju sljedeće obaveze u okviru kojih moraju:
 - a) prisustvovati sjednicama Skupštine VMGT čija su članica, te učestvovati u radu, predlaganju rješenja i odlučivanju;
 - b) davati prijedloge u vezi sa radom organa VMGT;
 - c) učestvovati u izradi akata VMGT;
 - d) predlagati inicijative u cilju poboljšanja životnih uslova mladih u Gradu Tuzla;
 - e) učestvovati u kreiranju i provođenju Strategije prema mladima Grada Tuzla;
 - f) redovno i pravovremeno obavještavati VMGT o svom djelovanju;
 - g) čuvati ugled VMGT;
 - h) djelovati u skladu s programom i ciljevima VMGT;
 - i) onemogućiti bilo kakvu politički, vjersku, spolnu ili rasnu diskriminaciju i spriječiti favoriziranje bilo kakvih interesa na štetu interesa mladih;
 - j) usmjeravati i usklađivati svoje međusobne odnose u zajedničke interese radi postizanja ciljeva VMGT u skladu sa Zakonom, Statutom i drugim normativnim aktima;
 - k) preko VMGT ostvarivati kontakte i saradnju s organima uprave, institucijama i drugim subjektima koji mogu doprinijeti poboljšanju položaja mladih;
 - l) zagovarati mjere i radnje za poboljšanje položaja mladih na prostoru na kojem VMGT djeluje;
 - m) izrađivati i stavljati na raspolaganje podatke i izvještaje koje bude tražilo VMGT u cilju promocije VMGT u javnosti i vođenja statistike;
 - n) pridržavati se Statuta VMGT, zaključaka, odluka i drugih akata VMGT.

V STJECANJE I RASPOLAGANJE IMOVINOM

Član 22.

- (1) VMGT može stjecati prihode iz sljedećih izvora:
 - a) članarina,
 - b) nepovratnih grantova za provođenje projekata,
 - c) dobrovoljnih priloga fizičkih i pravnih lica,
 - d) pružanjem usluga za realizaciju aktivnosti propisanih programom,
 - e) subvencija i ugovora s organima vlasti, javnim institucijama, fizičkim i pravnim licima, domaćim i međunarodnim organizacijama,
 - f) drugih izvora u skladu sa Zakonom i Statutom.
- (2) Političke stranke ne mogu ni na koji način materijalno i finansijski potpomagati rad VMGT.
- (3) O stjecanju prihoda, korištenju imovine i raspolaganju sredstvima VMGT odlučuje Upravni odbor VMGT u skladu s ovim Statutom i općim aktima VMGT.
- (4) Bliže odredbe o stjecanju prihoda i raspolaganju imovinom VMGT definisane su Pravilnikom u upravljanju stalnim sredstvima.

Član 23.

- (1) VMGT dužno je uredno voditi poslovne knjige u skladu sa Zakonom i sastavljati finansijske izvještaje, saglasno važećim propisima.

VI JAVNOST RADA

Član 24.

- (1) Rad VMGT je javan.
- (2) Javnost rada se ostvaruje:
 - a) javnim održavanjem sjednica Skupštine VMGT i pozivanjem na prisustvo predstavnika/ca organa lokalne uprave i medija,
 - b) pravovremenim dostavljanjem izvještaja o radu svojim članicama, organima vlasti, medijima, te drugim zainteresovanim stranama.
- (3) Članovi/ice Upravnog odbora VMGT neće učiniti dostupnim javnosti podatke koji se proglašavaju internim.

Član 25.

- (1) Za javnost rada VMGT brine se Upravni odbor VMGT.

VII STATUT I DRUGI OPĆI AKTI VMGT – IZMJENE I DOPUNE STATUTA

Član 26.

- (1) Inicijativu za izmjene i dopune Statuta može podnijeti svaka članica VMGT.
- (2) Inicijativa se podnosi Skupštini, u pisanom obliku i s odgovarajućim obrazloženjem.
- (3) Prijedlog za izmjene i dopune Statuta utvrđuje Skupština.
- (4) Utvrđeni prijedlog dostavlja se Skupštini VMGT najmanje 14 (četrnaest) dana prije održavanja sjednice Skupštine.
- (5) O izmjenama i dopunama Statuta odlučuje Skupština VMGT, u skladu s članom 10. Statuta.

Član 27.

- (1) Pored Statuta, VMGT može donositi i druge opće akte i to: odluke, pravilnike i poslovnike, rezolucije, deklaracije, inicijative itd.
- (2) Opći akti VMGT moraju biti u skladu sa Zakonom i Statutom.

VIII STATUSNE PROMJENE, PRIPAJANJE, RAZDVAJANJE I TRANSFORMISANJE UDRUŽENJA

Član 28.

- (1) VMGT se ne može pripojiti drugom udruženju.
- (2) VMGT se ne može razdvojiti na dva ili više udruženja.
- (3) VMGT je osnivač i članica Vijeća mladih Tuzlanskog kantona sve dok za to postoje ispunjeni uslovi u skladu sa Zakonom o mladima FBiH.

IX PRESTANAK RADA VMGT

Član 29.

- (1) VMGT može prestati s radom dobrovoljno ili po sili Zakona.
- (2) VMGT prestaje s radom ako Skupština VMGT donese odluku o raspuštanju.
- (3) Istovremeno s odlukom o raspuštanju VMGT, Skupština donosi plan likvidacije VMGT, kojim se utvrđuje raspored imovine, prava i obaveze VMGT, u skladu sa Statutom.
- (4) VMGT će prestati djelovati u slučaju:
 - a) da je proteklo dvostruko više vremena od vremena utvrđenog Statutom za održavanje Skupštine VMGT, a Skupština VMGT nije održana;
 - b) da se broj članica VMGT smanji ispod 3 (tri), a Skupština u roku od 3 (tri) mjeseca od dana nastupanja ove okolnosti ne donese odluku o prijemu novih članica.

X PRELAZNE I ZAVRŠNE ODREDBE

Član 30.

- (1) Na pitanja koja nisu uređena Statutom primjenjuju se odredbe Zakona o udruženjima i fondacijama FBiH, kao i odredbe Zakona o mladima FBiH.
- (2) Opći akti VMGT donijet će se u roku od 90 (devedeset) dana od dana usvajanja ovog Statuta.
- (3) Tumačenje Statuta daje Skupština VMGT.

Član 31.

- (1) Izmijenjen i dopunjen Statut Vijeća mladih Grada Tuzla stupa na snagu danom usvajanja na Skupštini VMGT, a primjenjivat će se od dana upisa promjena u Registar udruženja kod nadležnog ministarstva.

U Tuzli, 19.11.2025.
Broj protokola: 76/25

Belmin Tukić
Predsjednik Skupštine VMGT